


Ulasan Buku / Book Review



Issues in Islamization of Human Knowledge: Civilization Building Discourse of Contemporary Muslim Thinkers
oleh Muhammad Mumtaz Ali, IIUM Press, Gombak. 2014 (Cetakan Pertama) 198 halaman.
ISBN 978-967-418-314-1

Isu isu dalam Peng-Islamisasi-an Ilmu Pengetahuan (*Islamization of Knowledge*) telah mendasari perbincangan dalam kalangan ahli-ahli sarjana pendidikan seluruh dunia semenjak sekian lama. Di sebalik literatur dalam topik ini yang kelihatan sudah agak mantap, penumpuan aspek aspek tertentu berkaitan topik ini tetap malar segar untuk dicernakan. Justeru, buku “Issues in Islamization of Human Knowledge: Civilization Building Discourse of Contemporary Muslim Thinkers” yang disusun oleh Muhammad Mumtaz Ali diangkat untuk diulas dalam Jurnal MALIM edisi kali ini.

Buku terbitan Penerbit UIAM (*IIUM Press*) tahun 2014 yang mengandungi 198 halaman ini meliputi 9 bab yang bertindak sebagai wacana dalam mengangkat tema tema teras *Islamization of Knowledge* atau ringkasnya IOK khususnya dalam konteks Ilmu Kemanusiaan (*Human Knowledge*) yang meliputi perkara perkara pokok seperti pemeraksanaan intelektual, sudut pandang IOK sebagai suatu yang universal dan mesra manusiawi, yang tidak hanya seputar hal hal keagamaan, di samping penumpuan kepada aspek metodologi IOK melalui pencerakinan gagasan gagasan yang dibawa sarjana sarjana pemikir IOK kontemporari.

Bagi pembuka halaman, Bab 1 memberikan pendahuluan yang berupa liputan asas keseluruhan intipati buku dengan babnya yang hanya berjudul “*Introduction*”. Muhammad

Mumtaz Ali dalam bab ini mengupas secara menyeluruh terhadap perkembangan sepintas lalu IOK dan peri pentingnya untuk mencari dan mempersembahkan “kebenaran” dan “relaiti” yang sebenar. Cara persembahan kemas dalam bahasa akademik yang tidak terlalu tinggi beserta lenggok perbincangan yang lancar dalam susunan disusun rapi meliputi aspek aspek asas epistemologi, ontologi dan metodologi IOK menjadikan Bab Pengenalan awal ini mudah untuk dicerna.

Seterusnya Bab 2 cuba untuk membawa pembaca menghayati kepentingan IOK dalam konteks yang sebenar, bagaimana “Barat” telah mencorakkan “*knowledge*” semahu mereka, dan mengapa perlunya diangkat epistemologi dan metodologi IOK yang sebenar untuk difahami dengan jelas. Dalam babnya “*Islamization of Knowledge from Universal and People-Oriented Perspective*”, M Mumtaz Ali telah berjaya mengeluarkan intipati perbahasan kepentingan untuk memahami IOK, di samping mengulas konsep-konsep epistemologi dan metodologi IOK serta peri pentingnya mencari Kebenaran hakiki dan Realiti yang semuanya dipersembahkan kepada pembaca dalam pendekatan perspektif Islam yang lebih menyeluruh dan inklusif melalui contoh contoh beserta petikan petikan ayat ayat suci al-Quran al-Karim dan Hadith Hadith Rasul SAW.

Bab ke 3 pula memperihalkan tajuk “*Islamization of Human Knowledge Worldview - Kamal Hassan on Islamicisation of Knowledge and Relevantization of Islamic Science, 2010*” yang mana penulis telah membawa kepada kita sorotan definisi dan perkembangan istilah istilah yang digunapakai, dalam konteks ini oleh Prof Kamal Hassan; antaranya perbezaan antara *Islamization* dengan *Islamcisation*, dan konsep kerelevanan bidang Ilmu Wahyu Islam. Bab 4 tampil memberikan pemerihalan terperinci tentang takrif dan epistemologi IOK yang ada pada hari ini. Mumtaz Ali telah menjelaskan dengan baik dalam bab “*De-Westernization or Islamization of All Branches of Knowledge – Syed Muhammad Naquib al-Attas in 1970s on Islamization of Present-Day Knowledge: A Few New Dimensions*” ini berkaitan isu isu teras dalam epistemologi IOK yang mendasari pemahaman sebenar tentang IOK dan korpus ilmu yang dibentangkan oleh Prof Syed Muhammad Naquib al-Attas meliputi arti sebenar “kebenaran”, “ilmu” dan bagaimana “Barat” telah memesong dan mencorakkan kebenaran mengikut acuan dan warna mereka sehingga kita semua menjadi mangli seakan dibius dengan kekebalan, di samping mencungkil permasalahan sekularisme yang merantai pemikiran umat. Mumtaz Ali dalam Bab 5 buku ini yang bertajuk “*Islamization of Knowledge: General Principles and Work-Plan – Ismail Raji al-Faruqi in 1982*” mengajak kita meninjau dan memahami gagasan yang pernah dibawa oleh Ismail al-Faruqi dalam membentangkan wawasan IOK dalam bidang pendidikan melalui suatu pemahaman penyatuan yang lebih mudah untuk difahami.

Dalam bab seterusnya, Bab 6 yang berbunyi, “*AbdulHamid AbuSulayman on Islamization of Knowledge and Methodology of Islamic Thought*”, penulis telah mengutarakan suatu perdebatan antara metodologi IOK dan Pemikiran Islam dan bagaimana hubungan antara kedua-dua sistem yang berbeza ini boleh diletakkan di tempat yang sepatutnya.

Bab 7 yang selanjutnya berbunyi, “*Methodological Issues in Islamization of Knowledge*”, Mumtaz Ali telah cuba untuk mensistesis dan menyusun metodologi IOK dan Pemikiran Islam dan bagaimana metodologi ini dapat diperkembangkan dengan lebih mantap. Penulis juga telah merungkai kesulitan dan beberapa cabaran cabaran IOK dan Pemikiran Islam yang dihadapi dan bagaimana metodologi yang lebih mantap dapat didepani.

Mumtaz Ali seterusnya menggalas peranan yang lebih besar dalam Bab 8 dengan memperkenalkan “*The First Principles of Disciplines*” dalam babnya yang berbunyi “*Islamic Methodology and the First Principles of Disciplines*”. Bab ini telah membawa kepada kita satu anjakan paradigma dengan mengajak setiap daripada kita mendahulukan KeEsaan dan KeSatuan Ilahi dalam apa jua asas disiplin ilmu yang diceburi.

Akhirnya dalam Bab 9, “*The Work Plan of Islamization of Knowledge 1982 and 1989 Editions*”, yang sepertinya satu bab yang merumus model IOK sedia ada, Mumtaz Ali telah berjaya mencerna dan menyimpulkan IOK yang dikeluarkan pada 1982 dan 1989 dengan perbezaan dan persamaan yang cukup signifikan.

Demikianlah sebuah buku yang digarap dalam bidang *Islamization of Knowledge* (IOK) yang berjaya membawa satu perbincangan yang konklusif lagi menyeluruh berkaitan asas asas IOK, perkembangannya, cabarannya serta hala tuju masa depan IOK. Penerbitan buku ini membantu memberi cahaya kesedaran dan kefahaman umum perihal IOK dan mengajak kita untuk sentiasa mencari pedoman, panduan untuk penerimaan IOK dalam kalangan masyarakat, khususnya ahli ahli akademik. Jelaslah penghasilan buku “*Issues in Islamization of Human Knowledge: Civilization Building Discourse of Contemporary Muslim Thinkers*” yang disusun oleh Muhammad Mumtaz Ali ini telah berjaya mengisi kelompangan perbincangan dalam corpus ilmu IOK dan yang sewaktu dengannya serta mampu untuk menjadi pemangkin ke arah pemahaman IOK dengan lebih meluas lagi mendalam.

JAMSARI ALIAS

Pusat Citra Universiti,

Universiti Kebangsaan Malaysia

43600 Bangi, Selangor

Malaysia

E-mail: jamsari@ukm.edu.my

NORAZILA MAT

Fakulti Ekonomi dan Pengurusan,

Universiti Kebangsaan Malaysia

43600 Bangi, Selangor

Malaysia

E-mail: norazila@ukm.edu.my